

四庫全書

子部

# 欽定四庫全書

子部

太平御覽卷

七十八至  
八十

詳校官侍讀學士<sub>臣</sub>沈咸熙

員外郎<sub>臣</sub>牛稔文覆勘

總校官降調編修<sub>臣</sub>倉聖脈

校對官助教<sub>臣</sub>胡子襄

謄錄監生<sub>臣</sub>張曾詣

欽定四庫全書

太平御覽卷七十八

宋 李昉等 撰

皇王部三

天皇

地皇

人皇

有巢氏

燧人氏

太昊庖犧氏

女媧氏

炎帝神農氏

天皇

項峻始學篇曰天地立有天皇十二頭號曰天靈治萬  
八千歲以木德王

洞真記曰天皇十二頭一姓十二人也註曰古人質以  
頭為數猶今之數鳥獸以頭為計若曰十頭鹿非鹿十  
頭也

徐整三五歷記曰溟滓始芽濛鴻滋萌歲起攝提元氣  
肇啟有神靈人十二頭號曰天皇

春秋緯曰天皇地皇人皇兄弟九人分爲九州長天下也

河圖括地象曰天皇九翼題名旋復

帝系譜曰天地初起即生天皇治萬八千歲以木德王

遁甲開山圖曰天皇被跡在柱州崑崙山下

榮氏注曰天皇兄弟

十二人身貌相類不可分別治在柱州崑崙也

### 地皇

項峻始學篇曰地皇十二頭各萬八千歲

洞紀曰地皇十二頭

帝系譜曰地皇治一萬八千歲以火德王

二五歷紀曰有神聖十二頭號地皇

遁甲開山圖曰地皇興於熊耳龍門山

榮氏注曰地皇兄弟九人面貌

皆如女子貌皆相類蛇身獸足生於龍門山中

### 人皇

春秋命歷序曰人皇氏九頭駕六羽乘雲車出谷口分

九州

朱均注曰九頭兄弟九人

項峻始學篇曰人皇九頭兄弟各三分人各百歲依山  
川土地之勢裁度為九州各居其一方因是而區別

遁甲開山圖曰人皇起於刑馬

榮氏注曰人皇兄弟九人  
生於刑馬山身有九也

二五歷紀曰有神聖人九頭號人皇

馬摠云一百六十  
五代合四萬五千

六百  
并

天皇地皇人皇為太古

### 有巢氏

禮曰昔先王未有宮室冬則居營窟夏則居橧巢

鄭玄  
注曰

冬則居土暑則聚  
薪柴居其上也

項峻始學篇曰上古昏穴處有聖人教之巢居號大巢氏今南方人巢居北方人穴處古之遺俗也

皇甫謐以  
為有巢在

女媧  
之後

韓子曰上古之世人民少而禽獸多人不勝禽獸蛇虺有聖人構木為巢以避羣害而人悅之使王天下號之曰有巢氏

遁甲開山圖曰石樓山在琅琊昔有巢氏治此山南

王天

下百有餘代  
未詳年代也



燧人氏

無文籍未有  
甲歷紀年歲

易通卦驗曰燧皇始出握機矩表計冥圖其刻曰蒼渠

通靈

鄭玄注曰矩法也燧皇也謂燧人在伏羲前作其  
圖謂之計冥時無書刻石而謂之且刻曰蒼精渠

肩之人能通  
神靈之意也

尚書大傳曰燧人為燧皇燧人以火紀官火陽也陽尊  
故託燧皇於天

禮含文嘉曰燧人始鑽木取火炮生為熟令人無腹疾  
有異於禽獸遂天之意故謂燧人

古史考曰太古之初人吮露精食草木實穴居野處山則食鳥獸衣其羽皮飲血茹毛近水則食魚鼈螺蛤未有火化腥臊多害腸胃於是有聖人以火德王造作鑕燧出火教人熟食鑄金作刀民人大悅號曰燧人

禮曰昔者先王未有火化

食腥也

食草木之實鳥獸之肉

飲其血茹其毛

此上古之時也

後聖人有作

作起

然後修火之利

范金

鑄作器用

合土

瓦甃甕及甌大

以炮以燔以烹以炙以為醴醑

王子年拾遺錄曰遂明國有大樹名遂屈盤萬頃後世

有聖人遊日月之外至於其國息此樹下有鳥啄樹繁  
然火出聖人感焉因用小枝鑽火號燧人氏

太昊庖犧氏

皇王世紀曰太昊帝庖犧氏風姓也蛇身人首有聖德  
都陳作瑟三十六絃燧人氏沒庖犧氏代之繼天而生  
首德於木為百王先帝出於震未有所因故位在東方  
主春象日之明是稱太昊制嫁娶之禮取犧牲以充庖  
厨故號曰庖犧皇後世音謬故或謂之宓犧

一解云宓  
古伏字後

誤以宓為密  
故號曰宓犧

一號雄皇氏在位一百一十年

易繫辭曰古者庖犧氏之王天下仰則觀象於天俯則觀法於地中觀鳥獸之文與天地之宜近取諸身遠取諸物於是始作八卦以通神明之德以類萬物之情又曰作結繩而為網罟以畋以漁蓋取諸離

河圖曰伏犧禪於伯牛鑽木作火

易坤靈圖曰宓犧時立允部氏易理

易通卦驗曰宓犧方牙蒼精作易無書以畫事

鄭玄曰  
宓犧時

質樸作易以為政令而不書  
但以畫其事之形象而已

詩含神霧曰大跡出雷澤華胥履之生庖犧

宋均注曰雷澤地名

華胥伏

義母

禮含文嘉曰伏者別也犧者獻也法也伏犧德洽上下

天應之以鳥獸文章地應之以龜書伏犧乃則象作易

卦

左傳曰郊子曰太皞氏以龍紀故為龍師而龍名

杜預注曰

太皞伏羲氏風始祖也有龍瑞故以龍命官昭公十七年

春秋內事曰伏羲氏以木德王天下之人未有宅室未有水火之和於是乃仰觀天文俯察地理始畫八卦定天地之位分陰陽之數推列三光建分八節以文應瑞凡二十四消息禍福以制吉凶

又曰天地開闢五緯各在其方至伏羲乃合故以為元

孝經援神契曰伏羲氏日角衡連珠

宋均曰伏羲木精人也日角者骨表

取象日所出房所立有星也衡中有骨表而連珠象玉衡有星也

又曰鉤命訣曰華胥履跡恠生皇犧

跡者神異之跡也履跡而生以為帝

也 恠

遁甲開山圖曰仇夷山西絕孤立太昊之治伏羲生處  
帝系譜曰伏羲人頭蛇身以十月四日人定時生  
崔寔政論曰太昊之世設九庖之官

魏陳王曹植庖羲贊曰木德風姓八卦創焉龍瑞名官  
法地象天庖厨祭祀罍網魚豢瑟以象時神德通玄

女媧氏

帝王世紀曰女媧氏亦風姓也承庖羲制度亦蛇身人

首一號女希是為女皇未有諸侯有共工氏任智刑以強伯而不王以水承木非行次故易不載

歸藏曰昔女媧筮張雲幕枚占之曰吉昭昭九州日月代極平均土地和合四國

山海經曰女媧之腸化為神處粟廣之野

郭璞注曰女媧古神女而

帝者人面蛇身一曰中七十變其腸化為此神粟廣野名也

禮曰女媧之笙簧

女媧三皇承宓義者笙簧笙中之簧也世本曰女媧作笙簧也

淮南子曰往古之時四極廢九州裂天不兼覆地不周



載火濫焱而不滅水浩洋而不息猛獸食精民

高誘注曰精善

也鷲鳥攫老弱於是女媧鍊五色石以補蒼天

女媧陰氏佐伏

義治者也斷鼇足以立四極

黑龍水精也故力牧太山稽殺之以止雨也極者至也冀州九

州中謂合四海之內

積蘆灰以止淫水

蘆葦也葦生於水故積聚其灰以止其淫水平地出

水為淫水

民生背方州抱周天

方州地也

和春陽夏殺秋約冬枕

方寢繩

方矩四寸也寢繩直身而卧也

風俗通曰俗說天地開闢未有人民女媧搏黃土作人

劇務力不暇供乃引繩於泥中舉以為人故富貴者黃

土人也貧賤者絀也

遁甲開山圖曰女媧氏沒大庭氏王有天下五氣異色  
次有柏皇氏中央氏栗陸氏驪連氏赫胥氏尊盧氏祝  
融氏混沌氏昊英氏有巢氏葛天氏陰康氏朱襄氏無  
懷氏凡十五代皆襲庖羲之號自無懷氏已上經史不

載莫知都之所在

共工氏水德君木火之間霸而不王  
女媧是三皇之稱三皇者多有不同

以太昊炎帝為二皇其一或稱女媧或稱祝融或稱共  
工未知孰是自女媧至無懷十五代合一萬七千七百

八十  
七歲

魏陳王曹植女媧贊曰古之國君製造笙簧禮物未就  
軒轅纂成或云二君人首蛇形神化七十何德之靈

炎帝神農氏

帝王世紀曰神農氏姜姓也母曰任姒有喬氏之女名  
女登為少典妃遊於華陽有神龍首感女登於常生炎  
帝人身牛首長於姜水有聖德以火承木位在南方主  
夏故謂之炎帝都於陳作五絃之琴凡八世帝承帝臨  
帝明帝直帝來帝哀帝榆罔又曰本起烈山或時稱之

一號魁隗氏是為農皇或曰炎帝時諸侯夙沙氏叛不用命炎帝退而修德夙沙之民自攻其君而歸炎帝營都於魯重八卦之數究八八之體為六十四卦在位百二十年而崩葬長沙

易下繫曰神農氏作斲木為耜揉木為耒耒耜之利以教天下蓋取諸益

禮含文嘉曰神者信也農者濃也始作耒耜教民耕其德濃厚若神故謂神農也

古史考曰炎帝有火應故置官司皆以火為名

傳曰郟子曰炎帝以火紀故為火師而火名

杜預注曰神農姜姓

之祖也有火瑞以火紀事名官也

春秋命歷序曰有神人名石耳蒼色大眉戴玉理

日月清明

有次序故神應和氣以生也玉理猶玉英玉勝也

駕六龍出地輔號皇神農始

立地形甄度四海東西九十萬里南北八十一萬里

所為

如此其教如神農植樹木使民粒食故天下號曰皇神農也甄紀地形遠近山川林澤所至

孝經鉤命訣曰任已感龍生帝魁

任已帝魁之母也魁神農名已或作姁也

典略曰武王伐紂封神農之後於鯀

文子曰赤帝為火災故黃帝擒之

越絕書曰神農不貪天下而天下共富之  
不以其智自貴於人而天下共尊之

莊子曰矢矢甘與神農同學於老龍吉  
神農隱几闔戶晝瞑矢矢甘日中夢戶  
而入曰老龍死矣神農隱几擁杖而起  
矢然放杖而笑曰天知予僻陋慢誕故  
棄予而死已矣夫子無所發予之狂言而  
死已夫悟死不足驚

故還放杖而笑

尸子曰神農氏夫負妻戴以治天下堯曰朕之比神農猶旦之與昏也

又曰神農氏七十世有天下豈每世賢哉牧民易也

淮南子曰古者民茹草飲水採樹木之實食羸蚌之肉時多疹病毒傷之害於是神農乃始教民播種五穀相土地之宜燥濕肥磽高下嘗百草之滋味泉之甘苦令民知所避就當此之時一日而遇七十毒

又曰神農之治天下也神農馳於胷中知不出於四域懷其神試之心甘雨以時五穀蕃殖春生夏長秋收冬藏月省時考終歲獻貢以時嘗穀祀于明堂之制有善而無惡風雨不能襲燥濕不能傷養民以公其民樸重端慤不忿爭而財足不勞形而成功因天地之貢資而與之和同是故威厲而不試刑措而不用法省而不煩教化如神其地南至交趾北至幽都東至陽谷西至三危莫不聽從當此之時法寬刑緩囹圄空虛而天下一



俗莫懷姦心

又曰神農皇帝襲九空重九望

九空九天也  
九望九地也

神農本草曰神農稽首再拜問於太一小子曰曾聞古之時壽過百歲而殂落之咎獨何氣使然耶太一小子曰天有九門中道最良神農乃從其嘗藥以拯救人命周書曰神農之時天雨粟神農耕而種之作陶冶斤斧為耒耜鉏耨以墾草莽然後五穀興

呂氏春秋曰神農教曰士有當年不耕者則天下或受

其饑矣女有當年不績者則天下或受其寒矣故夫親耕妻親績

賈誼書曰神農以為走獸難以久養民乃求可食之物嘗百草實察鹹苦之味教民食穀

陸景典畧曰神農嘗百草嘗五穀蒸民乃粒食

荊州圖記曰永陽縣西北二百三十里厲鄉山東有石穴昔神農生於厲鄉禮所謂烈山氏也後春秋時為厲國穴高三十丈長二百丈謂之神農穴



太平御覽卷七十八

欽定四庫全書

太平御覽卷七十九

宋 李昉等 撰

皇王部四

黃帝軒轅氏

少昊金天氏

顓頊高陽氏

黃帝軒轅氏

史記曰黃帝者少典之子姓公孫名軒轅諸侯有不順

者從而征之未嘗寧居東至于海登九山及岱宗西至崆峒登雞頭山南至江登熊湘北逐葷粥合符釜山而邑于涿鹿之阿遷徙無常處以師兵為營衛官名皆以雲置左右大監監于萬國獲寶鼎舉風后力牧常先大鴻以治民有土德之瑞故號曰黃帝有二十五子其得姓者十四人黃帝居軒轅之丘而娶於西陵氏之女是為嫫<sub>嫫音嫫</sub>祖為正妃生二子其後皆有天下其一曰玄囂是為青陽降居江水其二曰昌意降居弱水昌意娶蜀

山氏女曰昌僕生高陽高陽有聖德焉黃帝崩葬橋山其孫昌意之子高陽立是為帝顓頊

又封禪書曰黃帝採首山銅鑄鼎於荆山下鼎既成有龍垂胡髯下迎黃帝黃帝上騎羣臣後宮從上者七十餘人餘小臣不得上乃悉持龍髯龍髯拔墮墮帝之弓百姓仰望帝既上乃抱其弓與龍髯而號故後世因名其處曰鼎湖其弓曰烏號

又曰漢武帝北遂巡狩還祭黃帝冢上曰吾聞黃帝不

死今有冢何也或對曰黃帝已僊上天羣臣葬其衣冠耳

帝王世紀曰黃帝有熊氏少典之子姬姓也母曰附寶其先即炎帝母家有蟠氏之女世與少典氏婚故國語兼稱焉及神農氏之末少典氏又取附寶見大電光繞北斗樞星照郊野感附寶孕二十五月生黃帝於壽丘長於姬水龍顏有聖德受國於有熊居軒轅之丘故因以為名又以為號與神農氏戰于阪泉之野三戰而克



之力牧常先大鴻神農皇鉅封直人鎮火山稽鬼吏區  
封胡孝甲等或以為師或以為將分掌四方各如已視  
故號曰黃帝四佐又使岐伯嘗味百草典醫療疾今經  
方本草之書咸出焉其史倉頡又取像鳥跡始作文字  
史官之作蓋自此始記其言行策而藏之名曰書契黃  
帝一號帝鴻氏或曰歸藏氏或曰帝軒氏姬姓有四妃  
生二十五子在位百年而崩年百一十歲

又曰神農氏衰黃帝修德化民諸侯歸之黃帝於是乃

擾馴猛獸與神農氏戰于阪泉之野三戰而克之又徵諸侯使力牧神皇直討蚩尤氏擒之于涿鹿之野使應龍殺之于凶黎之丘凡五十五戰而天下大服或傳以為仙或言壽三百歲葬于上郡陽周之喬山

鬻子曰黃帝年十歲知神農之非而改其政

春秋內事曰軒轅氏以土德王天下始有堂室高棟深宇以避風雨

孝經鉤命訣曰附寶出降大靈生帝軒

附寶帝軒母也  
電黃精軒轅氣

也軒皇帝名

附或作付也

古史考曰有熊氏已姓或曰姓公孫

山海經曰有人衣青名曰黃帝女妖

青魑旱鬼也

蚩尤作兵

伐黃帝黃帝乃令應龍攻之冀州之野

冀州中土

應龍蓄水

蚩尤請風伯雨師從大風雨黃帝乃下天女曰妖雨止

遂殺蚩尤

歸藏曰昔黃帝與炎神爭鬪涿鹿之野將戰筮於巫巫

咸曰果哉而有咎

易下繫曰黃帝垂衣裳而天下治蓋取諸乾坤

河圖握樞曰黃帝名軒北斗黃帝之精母地祇之女附寶之郊野大雷繞斗樞星耀感附寶生軒曾文曰黃帝子

河圖挺佐輔曰黃帝修德立義天下大治乃召天老而問焉余夢見雨龍挺白圖即帝以授余於河之都覺昧素善不知其理敢問於子天老曰河出龍圖雒出龜書紀帝錄列聖人之紀姓號興謀治平然後鳳凰處之今

鳳凰已下三百六十日矣古之圖紀天其授帝圖乎黃  
帝乃祓齋七日衣黃衣冠黃冕駕黃龍之乘戴蛟龍之  
旗天老五聖皆從以遊河洛之間求所夢見者之處弗  
得至於翠嬀之淵大鱸魚沂流而至乃問天老曰子見  
夫中河流者乎曰見之顧問五聖皆曰莫見乃辭左右  
獨與天老跪而迎之五色畢具天老以授黃帝黃帝舒  
視之名曰錄圖

龍魚河圖曰黃龍負圖鱗甲成字從河中出付黃帝令

侍臣自寫以示天下

又曰黃帝攝政時有蚩尤兄弟八十一人並獸身人語  
銅頭鐵額食沙石子造立兵仗刀戟大弩威振天下誅  
殺無道不仁不慈萬民欲令黃帝行天子事黃帝仁義  
不能禁止蚩尤遂不敵仰天而歎天遣玄女下授黃帝兵  
信神符制伏蚩尤以制八方蚩尤歿後天下復擾亂不  
寧黃帝遂畫蚩尤形像以威天下天下咸謂蚩尤不死  
八方萬邦皆為弭伏

尚書中候曰帝軒提像配永循機

軒轅黃帝名永長也  
循順也黃帝軒轅觀

攝提之像配而行之以  
長為順升機為政焉

天地體通五行期化

體美也天  
地美氣相

通行應四時  
之期而變化

河龍圖出

龍銜圖  
而出也

洛龜書成

龜負書而  
出成則也

赤

文像字以授軒轅

韓詩外傳曰黃帝召天老而問鳳像何如天老曰夫鳳

像鴻前而麟後蛇頭而魚尾龍文而鷄身燕頤而鷄啄

黃帝乃齋于中宮鳳蔽日而至黃帝降于東階西面再

拜稽首皇天降祉敢不承命鳳乃止帝東園

詩含神霧曰大電繞樞照郊野感附寶生黃帝

大戴禮曰宰我問於孔子曰昔者予問諸榮君黃帝三  
百年請問黃帝人也抑非人耶何以至於三百年孔子  
曰黃帝少典之子也曰軒轅生而神靈弱而能言教熊  
羆貔貅豹虎以與赤帝大戰于阪泉之野三戰然後得  
行其志黃帝黼黻衣大帶斧裳乘龍駕雲勞勲心力耳  
目節用水火財物生而民得其利百年死而民得其神  
百年亡而民得其教百年故曰三百年



傳曰黃帝以雲紀故為雲師而雲名

春秋元命苞曰黃帝龍顏得天庭陽上法中宿取象文昌戴天履陰秉數制剛

管子曰黃帝得蚩尤而明乎天道得太常而察乎地利得蒼龍而辨乎東方得祝融而辨乎南方得大封而辨乎西方得后土而辨乎北方黃帝得六相而天下治

又曰黃帝鑛燧生火以熟葷臊民食之無腸胃之病

列子曰黃帝即位十有五年竭聰明盡智力營百姓焦

然肌色疢

古旱切

黥

音妹

昏然五情爽惑

用聰明未足以致治祇足以亂神也

黃帝乃喟然歎曰朕之過淫矣

淫當作深

養一己其患如此

治萬物其患如此

惟任而不養縱而不治則性命自全天下自安

於是放萬機

舍宮寢去直侍徹鍾懸減厨膳退而閒居大庭之館齋

心服形三月不親政事晝寢而夢遊於華胥氏國華胥

氏國在弇州之西台州之北不知斯齊國幾千萬里

斯離

也齊中也

蓋非舟車足力之所及神遊而已其國無師長其

民無嗜慾不知樂生不知惡死故無夭傷不知親己不

知疎物故無憎愛不知背逆不知向順故無利害都無

所愛憎都無所畏忌入水不溺入火不熱斫撻無傷痛

至和者無物能傷溺  
熱痛癢實由於吝恤也乘空如履實寢虛若處牀雲霧不

闕其視雷霆不亂其聽美惡不汨其心山谷不躡其步

神行而已黃帝既悟怡然自得又二十有八年天下大

治幾若華胥氏之國而帝登假

假當  
為遐

莊子曰北門成問於黃帝張咸池之樂於洞庭之野吾  
始聞之而懼復聞之而惑帝曰吾奏之以人徵之以天

行之以義禮建之以太清

又曰黃帝將見大隗于具茨之山方明為御昌寓驂乘張  
若隰朋前馬昆閭滑稽後車至於襄城之野七聖皆迷  
無所問途適遇牧馬童子問途焉曰若知具茨之山乎

曰然若知大隗之所存乎曰然黃帝曰異哉小童非徒  
知具茨之山又知大隗之所存請問為天下小童辭黃  
帝又問小童曰夫為天下者亦奚以異乎牧馬者哉亦  
去其害馬者而已矣

馬以過  
分為害

黃帝再拜稽首稱天師而

退

又曰黃帝聞廣成子在於崆峒之上故往見之曰敢問  
至道之精廣成子曰自而治天下雲氣不待簇而雨草  
木不待黃而落日月之光益以荒矣又奚足以語至道  
黃帝退捐天下築特室席白茅閒居三月復往邀之廣  
成子南首而卧黃帝從下風膝行而進再拜稽首而問  
曰聞吾子達於至道敢問治身奈何而可以長久廣成  
子矚然而起曰善哉問乎來吾語汝至道之精窈窕冥

冥至道之極昏昏默默無視無聽抱神以靜形將自正  
我修身千百歲矣吾形未嘗衰黃帝再拜稽首曰廣成  
子之謂天矣

尸子曰子貢曰古者黃帝四面信乎孔子曰黃帝取合  
己者四人使治四方不計而耕不約而成此之謂四面  
韓子曰師曠謂晉平公曰黃帝合鬼神於西太山之上  
駕象車交六龍畢方並館蚩尤居前風伯進掃雨師灑  
道乃作為清角之樂

淮南子曰黃帝治天下力牧太山稽輔之

力牧太山稽輔則黃帝之

師也以理日月星辰之道治陰陽之氣節四時之度正律

厯之數明上下等貴賤使強不得掩弱衆不得暴寡人

民保命不夭

能安性命不夭折也

歲時熟而不凶百官正而不私

上下調而無尤法令明而不闇輔佐公而不阿

卿士公正不阿

意曲從

田者不侵畔漁者不爭隈

隈曲深處魚所聚也

道不拾遺市

不預價城郭不閉邑無盜賊商旅之人相讓以財狗彘

吐菽粟於道路而無忿爭之心於是日月精明星辰不

失其道風雨時節五穀登熟虎豹不妄噬鷙鳥不妄搏

鳳凰翔於庭麒麟遊於郊青龍進駕飛黃伏皂

飛黃出西方其

狀如狐頂上有角乘之壽千歲皂握也

諸北僭耳之國莫不獻其貢職

論衡曰諡法靖民則法曰皇德象天地曰帝皇帝者安民之諡非得道之稱也

蔣子萬機論曰黃帝之初養性愛民不好戰伐而四帝各以方色稱號交共謀之邊城日驚介冑不釋黃帝歎曰夫君危于上民安于下主失於國其臣再嫁厥疾之



由非養寇耶今處民萌之上而四盜亢衡遽震予師於是遂師營壘以滅四帝向令黃帝若不龍驤虎變而與俗同道則其民臣嫁于四帝矣

抱朴子曰黃帝生而能言役使百靈可謂天授自然之體者猶復不敢端坐而得道故涉王屋而受丹經到鼎湖而飛流珠至崆峒而問廣成上具茨而事大隗適東岱而奉中黃入金谷而諮老子論道養則質玄素二女精推步則訪山稽力牧講占候則詢風后著述作則受

雷岐審攻戰則納五音之策窮神姦則記四澤之亂相  
地理則書青鳥之說救傷殘則綴金冶之術故能畢記  
秘要窮盡道真

又曰昔黃帝東到青丘過風山見紫府先受三皇內文  
以勅召萬神南到負隴陰連木觀百靈之所登採若戟  
之華飲丹巒之水西見中黃子受九品之方過崆峒從  
廣成子受自然之經北到洪隄上具茨見大隗君黃蓋  
童子授神芝圖還陟王屋得神丹注說到峨嵋山見皇

人於玉堂

又曰汲冢中竹書言黃帝既仙去其臣有左徹者削木為黃帝之像帥諸侯朝奉之故司空張茂先撰博物志亦云黃帝仙去其臣思戀罔極或刻木立像而朝之或取其衣冠而葬之或立廟而四時祠之

孫綽子曰黃帝之遊天衢奏鈞天之鼓建日月之旗乘瑤雲之輿駕六翼之龍彭祖前驅松喬俠轂光景流而不見長風逐而不及發軔紫宮不崇朝而匝六合也

符子曰黃帝將適昆虞之丘中路逢容成子乘翠華之蓋建日月之旗驂紫虬御雙鳥黃帝命方明避路謂容成子曰吾將釣于一壑栖于一丘

又曰黃帝謂其友無為子曰我勞天下矣疲於形役請息駕于玄圃子其代之無為子曰焉能棄我之逸而為君之勞哉乃攀龍而俱去

晉牽秀黃帝頌曰邈矣軒轅應天載靈通幽遠覽觀象設形誕敷厥訓彛倫攸經德從風流化與雲征皇猷允

塞地平天成爰登方岳封禪勒成紛然鳳舉龍騰太清  
違茲九土陟彼高冥民斯攸慕涕泗沾纓遐而不墜式  
頌德聲

帝王世紀曰有巢氏以降至黃帝為三皇號中古

少昊金天氏

帝王世紀曰少昊帝名摯字青陽姬姓也母曰女節黃  
帝時有大星如虹下流華渚女節夢接意感生少昊是  
為玄囂降居江水有聖德邑于窮桑以登帝位都曲阜

故或謂之窮桑帝以金承土帝圖讖所謂白帝朱宣者也故稱少昊號金天氏在位百年而崩

河圖曰大星如虹下流華渚女節氣感生白帝朱宣

宋均

注云朱宣少昊氏也

古史考曰窮桑氏嬴姓也以金德王故號金天氏或曰宗師太昊之道故曰少昊

遁甲開山圖曰帝少昊死葬雲陽山

傳曰魯昭公十七年郊子來朝昭子問焉曰少皞氏鳥

名官何故也郊子曰吾祖也我高祖少昊摯之立也鳳  
鳥適至故紀於鳥為鳥師而鳥名鳳鳥氏歷正也玄鳥  
氏司分者也伯趙氏司至者也青鳥氏司啓者也丹鳥  
氏司閉者也祝鳩氏司徒也鳴鳩氏司馬也鴈鳩氏司  
空也爽鳩氏司寇也鵲鳩氏司事也五鳩鳩氏者也五  
雉為五工正利器用正度量夷民者也九扈為九農正  
扈民無淫者也

魏曹植少昊贊曰祖自軒轅青陽之裔金德承土儀鳳

帝世官鳥號名殊職別系農正扈民各有品制

顓頊高陽氏

史記曰顓頊靜淵以有謀疏通而知事養材以任地載時以像天依鬼神以制義治氣以教化潔誠以祭祀帝生子曰窮蟬顓頊崩而玄囂之孫高辛立是為帝嚳  
古史考曰高陽氏姬姓以水德王

帝王世紀曰帝顓頊高陽氏黃帝之孫昌意之子姬姓也母曰景僕蜀山氏女為昌意正妃謂之女樞金天氏



之末女樞生顓頊於若水首戴干戈有聖德父昌意雖  
黃帝之嫡以德劣降居若水為諸侯及顓頊生十年而  
佐少昊十二年而冠二十二而登帝位平九黎之亂以水  
事紀官命南正重司天以屬神北正黎司地以屬民於  
是民神不雜萬物有序始都窮桑後徙商丘命飛龍効  
八風之音作樂五莢以祭上帝納勝墳氏女嫫生老童  
有才子八人號八愷顓頊在位七十八年年九十一歲  
歲在鶉火而崩葬東郡頓丘廣陽里

河圖曰瑤光之星如蜺貫月正白感女樞幽房之宮生黑帝顓頊

大戴禮曰宰我曰請問帝顓頊孔子曰顓頊黃帝之孫昌意之子乘龍而至四海北至幽陵南至交趾西濟於流沙東至於蟠木動靜之物大小之神日月所照莫不抵厯

春秋元命苞曰顓頊併幹上法月參集威成紀以理陰

陽

併猶重也水精主月參伐主斬刈成功兼此月職重助費以為表也

山海經曰黃帝妻嫫祖生昌意降處若水生幹流取倬  
子曰河女生帝顓頊

又曰顓頊死即復蘇

淮南子曰顓頊之法婦人不避男子於路者祓之於四

達之衢

祓音拂除  
其不祥

魏曹植帝顓頊曰昌意之子祖自軒轅始誅九黎水德  
統天以國為號風化神宣威鴻八極靡不祗虔

太平御覽卷七十九

欽定四庫全書

太平御覽卷八十

宋 李昉等 撰

皇王部五

帝嚳高辛氏

帝摯

帝堯陶唐氏

帝嚳高辛氏

史記曰帝嚳高辛氏者黃帝之曾孫也父曰蟠極蟠極

父曰玄囂玄囂父曰黃帝自玄囂與蟠極皆不得在位  
至高辛即位高辛於顓頊為族子其色郁郁其德嶷嶷  
日月所照風雨所至莫不服從帝嚳稟陳鋒氏女生放  
勛娶姬訾氏女生摯帝嚳崩而摯代立

帝王世紀曰帝嚳高辛氏姬姓也其母不見生而神異  
自言其名曰逡齒有聖德年十五而佐顓頊三十登  
帝位都亳以人事紀官故以勾芒為木正祝融為火正  
蓐收為金正玄冥為水正后土為土正是五行之官分

職而治諸侯於是化被天下遂作樂六莖以康位世有才子八人號曰八元亦納四妃卜其子皆有天下元妃有邵氏女曰姜嫄生后稷次有娥氏女曰簡翟生高次陳豐氏女曰慶都生放勳次嫫毐氏女曰常儀生帝摯帝嚳在位七十五年一百五歲而崩葬東郡頓丘廣陽

里

陶弘景云在位六  
十三年年九十二

大戴禮曰宰我曰請問帝嚳孔子曰玄囂之孫蟠極之子曰高辛氏生而神靈自言其名取地之財而節用之

撫教萬民而利誨之歷日月而迎送之明鬼神而敬事  
之其色郁郁其德疑疑其動也時其服也士春夏乘龍  
秋冬乘馬黃斧黻衣執中而獲天下

禮記祭法曰帝嚳能序星辰以著衆

春秋元命苞曰帝嚳戴干是謂清明發節移蓋像招搖

干橈也招搖為天戈橈相  
副戴之像見天下以為表

古史考曰高辛氏或曰房姓以木德王

張顯析言曰高辛氏初生自言其名其居民終無迷謬



魏陳王曹植帝嘗贊曰祖自軒轅玄囂之裔生言其名  
木德帝世撫寧天地神靈察物教彌四海明並日月

### 帝摯

帝王世紀曰帝摯之母於四人之中其班最下而摯年  
兄弟最長故得登帝位封異母弟放勛為唐侯摯在位  
九年政軟弱而唐侯德盛諸侯歸之摯服其義乃率其  
羣臣造唐朝而致禪因委志心願為臣唐侯於是知有  
天命乃受帝禪而封摯於高辛氏事不經見漢故議郎

東海衛宏所傳云耳

帝堯陶唐氏

帝王世紀曰帝堯陶唐氏祁姓也母曰慶都孕十四月而生堯於丹陵名曰放勛或從母姓伊祁氏年十五而佐帝摯授封於唐為諸侯身長十尺常夢攀天而上故年二十而登帝位以火承木都平陽置敢諫之鼓天下大和命羲和四子羲仲羲叔和仲和叔分掌四岳諸侯有苗氏處南蠻而不服堯征而克之于丹水之浦乃以

尹壽許由為師命伯夔訪山川谿谷之音作樂大章天下大和百姓無事有八十老人擊壤歌于道觀者歎曰大哉帝之德也老人曰吾日出而作日入而息鑿井而飲耕田而食帝力何有於我哉有雋僥氏來貢沒羽厨中自生肉脯如翼形搖鼓自生風使食物寒自不臭名曰翼脯又有草夾階而生隨月生死王者以是占日月之數惟盛德之君應和而生故堯有之名蓂莢一名歷莢始封稷契咎繇褒進伯禹納舜于大麓後年二月又

率羣臣刻璧為書東沉于洛言天命當傳舜之意今中  
候運衡之篇是也舜攝政二十八年堯與方迴遊陽城  
而崩尚書所謂二十有八載放勳乃殂落是也百姓如  
喪考妣三載四海遏密八音凡堯即位九十八年年百  
一十八歲墨子以為堯堂高三尺土階三等堯取散宜  
氏女曰皇生丹朱又有庶子九人皆不肖故以天下命  
舜

又曰帝堯氏始封於唐今中山唐縣是也堯山在北唐

水在西北入河南有望都縣有都山即堯母慶都之所居也相去五十里都山一名亘山北登堯山南望都山故名其縣曰望都

春秋合誠圖曰堯母慶都有名於世蓋天帝之女生於斗維之野常在三河之南天火雷電有血流潤大石之中生慶都長大形像天帝常有黃雲覆蓋之夢食不飢及年二十寄伊長孺家出觀三河之首常若有神隨之

者

三河之首  
東河北端

有赤龍負圖出慶都讀之赤受天運

運錄也

下有圖人衣赤光面八彩鬚鬢長七尺二寸兌上豐下

足履翼翼署曰赤帝起誠天寶

衣赤光光像而又著衣也八彩彩色有八也翼

翼星大位宿也圖人傍有此署文七十也

奄然陰風雨赤龍與慶都合婚有

娠龍消不見

龍乘風雲故先陰風乃龍至也婚猶會合或為結也

既乳視堯如圖

表及堯有知慶都以圖予堯

如圖人儀表也

孝經援神契曰堯鳥庭荷勝八眉

堯火精人也鳥庭庭有鳥眉表取像朱鳥

與太微庭也朱鳥戴聖荷勝似之八眉眉彩色有八

論語曰大哉堯之為君也巍巍乎唯天為大唯堯則之

孔安國曰則法也美蕩蕩乎民無能名焉  
蕩蕩廣遠之稱言布德廣

遠氏無魏魏乎其有成功也  
功成化隆煥煥乎其有文章  
高大魏魏

孔叢子曰堯身脩十尺眉乃八彩實聖也

龍魚河圖曰堯時與羣臣賢者到翠嬀之淵大龜負圖

來出授堯勅臣下寫取畢龜還水中

易坤靈圖曰其母萌之玄雲入戶蛟龍守門  
母為慶都也天皇之

女天帝以玄雲覆御之故曰時乘六龍以御天也

又曰堯之精陽萬物莫不從者  
言堯在天陽精所在帝世有洪水

之灾天生聖人使救之故言乃統天也

書曰若稽古帝堯

孔安國曰若順稽考也能順考道而行之者帝堯

曰放勳欽

明文思安安

勳功欽敬也言堯放上世之初化而以敬明文思之四德安安當安者也

允恭

克讓光被四表格于上下

允信也克能也光充格至也既有四德又信恭能讓故其

名聞充溢四外至于天地也

克明峻德以親九族

能明峻德之士任用之以睦萬祖至

玄孫之親九族既睦乎章百姓

既已也百姓讎內民也言化九族而平章百姓也

百

姓昭明協和萬邦黎民於變時雍

昭亦明也協和黎衆時是雍和也言天下

衆民皆變是以風俗大和也



尚書中候曰帝堯即政七十載景星出翼鳳凰來庭

鄭玄

注曰翼

朱鳥宿 朱草生郊嘉禾孳連甘露潤液醴泉出山

朱草可以

染服者嘉美也書序曰唐叔得禾異畝同穎因名之為孳連醴亦甘 修壇河雒榮光起河

休氣四塞

休美也榮光五色從河出美氣四塞燭耀燭耀也

白雲起回風搖龍

馬御甲赤文綠色

龍形像馬也赤燥怒之使也甲所以藏圖赤文色而綠地也

臨壇

止霽吐甲圖而帶足

霽齊赤止也帶足者帶去也

又中候運行篇曰帝堯率羣臣東沉刻璧于雒

又曰天子臣放勛德薄施行不元

元善也

尚書大傳曰堯八眉舜四瞳子八者如八字也

又曰堯之王天下一人不刑而四海治

春秋元命苞曰堯眉八彩是謂通明歷象日月璇璣玉衡

大戴禮曰宰我曰請問帝堯孔子曰高辛之子也曰放勛其仁如天其智如神就之如日望之如雲富而不驕貴而不豫黃斧紆衣彤車白馬

六韜太公曰帝堯王天下之時金銀珠玉弗服錦繡文

綺弗衣奇怪異物弗御宮垣屋室弗崇楠椽柱楹不藻  
茅茨之堦弗剪黼黻之絰履不弊盡不更為也滋味不  
重糝弗食也溫飯煖羹不酸饅不易也不以私曲之故  
留耕種之時削心約志從事于國政

莊子曰昔堯之治天下也使天下之人欣欣焉人樂其  
生

又曰堯治天下之民平海內之政往見四子於姑射之  
山汾水之陽窅然喪其天下

四子許由齧缺被衣王倪也窅然猶幽然自失之貌

言堯以有事之心至於無  
為之人故亦無所用也

又曰堯觀于華封華封人曰嘻請祝聖人使聖人壽使  
聖人富使聖人多男子堯曰多男子則多懼多富則多  
事多壽則多辱封人曰夫聖人鵷居而鷖音食鳥行而

無章天下有道則與物皆昌無道則修德就閒千歲厭  
世去而上僊乘彼白雲至于帝鄉三患莫至身常無殃  
又曰堯治天下伯成子高立為諸侯及堯授舜舜授禹  
伯成子高辭為諸侯而耕禹往見之曰堯治天下吾子

立為諸侯堯授舜舜授余吾子辭而耕敢問何也子高  
曰昔堯治天下不賞而民勸不罰而民畏子今賞罰而  
民且不仁德自此衰刑自此立後世之亂自此始矣無  
落吾事佗佗音邑乎耕而不顧

尸子曰人之言君天下者瑤臺九累而堯白屋黼衣九  
種而堯大布宮中三市而堯鵠居糲飯菜粥麒麟青龍  
而堯素車玄駒

又曰堯舜有天下四海之內皆治而丹朱商均不與焉

而謂皆治者妄也

又曰舜受天下顏色不變堯以天下與舜顏色不變知天下無能損益於己也

又曰人戴冠躡履譽堯非桀而士或侮慢之知毀譽非其取也

韓子曰堯之王天下冬日鹿裘夏日葛衣茅茨不剪楅櫨不斲糲粱之食藜藿之羹雖監門之養不敵於此矣又曰由余謂秦穆公曰昔堯有天下飯於土盥飲於土

銅其土南至交趾北至幽都東西日月所出入者無不  
賓服

呂氏春秋曰堯有子十八人不與其子而授舜

孟子曰堯使九

男二女  
事舜也

又曰堯以天下讓於子州支父對曰以我為天子猶之

可也雖然我適有幽憂之病將治之未暇在天下也

幽隱

也詩云如  
有隱憂

天下重物也而不以天下害其生者故可託

天下

淮南子曰堯之治天下也舜為司徒契為司馬禹為司空后稷為大田師奚仲為工其導萬民也水處者木谷處者牧陸處者農地宜其事事宜其械械宜其用用宜其人澤臯織網陵阪耕田得以所有易所無以工易所拙是故離叛者寡而聽從者衆譬若播棊於地員者走屋方者處高各從其所安

又曰人之所以樂為天子者以窮耳目之欲而適身體之便也今高臺層榭人之所麗也而堯採椽不斲素題



不斫

言梁柱相折矩  
不著斫櫨也

珍怪奇味人之所美也堯櫛梁之

飯藜藿之美文錦狐白人之所好也而堯布衣掩形鹿裘禦寒養生之具不加厚而增之以大任重之以憂故舉天下而傳之舜若解重負然非直辭讓也

又曰堯治天下政教平德潤洽在位七十載乃求所屬天下之統令四嶽明揚側陋四嶽舉舜而薦之堯堯乃妻以二女以觀其內任以百官以觀其外既入大麓烈風雷雨不迷

林屬於川曰麓堯使舜入林  
麓之中遭大風雨不迷也

乃屬以九子

堯有九男贈以昭華之玉而傳天下焉

又曰堯之有天下也非貪萬民之富也而寧人主之位也以為萬姓力屈強弱相乘衆寡相暴於是堯乃身服節儉之行而明愛之仁以和輯之是故茅茨而不刻採椽而不斷大輅不畫大輅天子車也越席不緣越席東蒲席也大羹不和無有味也粢飯不鑿巡狩行教勤勞天下周流五嶽豈其奉養不足樂哉舉天下以為社稷非有利焉年衰志閔舉天下之重而傳之舜也猶却行而釋蹤也

又曰堯之時十日並出焦禾穗殺草木而民無所食窶

窶九嬰大風脩蛇封豕鑿齒為民害堯弋鑿齒於疇華

之澤

疇華南方澤也鑿齒獸持戈楯羿持弓箭射殺也

殺九嬰於凶水之上

九嬰

水之大怪為人之害者北杖之地有凶水者也繳大風於青丘之澤

大風大鷖鳥也繳以

石礮繳繫矢射之青丘東方也

上射十日

羿射日墮日中鳥羽

而下殺窶

音窶窶音窶

窶窶狀如龍形人齒食人也

斬脩蛇於洞庭

洞庭南方水也其蛇食象三歲而其骨出也

禽封豕於桑林

封豕大豕也桑林渴禱旱地

萬民皆喜置堯為天子

也

又曰堯王天下而憂不解授舜而憂乃釋

說苑曰河間獻王曰堯存心於天下有一人飢曰我飢之也有一人寒曰我寒之也一民有罪曰我陷之也仁昭而義立德博而化廣故不賞而人勸不罰而人懼先生而後殺是堯道也

揚子法言曰堯能則天者以其能臣二聖二聖舜禹也又曰堯舜之德輕於鴻毛

潛夫論曰堯舜之德譬猶偶燭施明於幽室也前燭照

之後燭益明非前燭昧後燭彰也乃二燭相因而成大光

荀悅申鑒曰思唐虞於上世瞻仲尼於中古乃知小道足羞也

譙子法訓曰唐虞之衣裳文法禹稷之溝洫耕稼人至今被之

袁子法書曰堯避舜於濟陰今定陶有堯冢信乎

符子曰許由謂堯曰坐于華殿之上面雙闕之下君之

榮願亦已足矣夫堯曰余坐華殿之上森然而松生于棟立於櫺扉之內霏焉而雲生于牖雖面雙闕無異乎崔嵬之冠蓬萊雖背墉郭無異乎迴巒之縈崑崙余安知其所以安榮

鄧析言曰古詩云堯舜至聖身如脯腊桀紂無道肌膚二尺

夢書曰堯夢乘龍上天舜夢擊天鼓

續述征記曰城陽縣有堯冢自漢晉二千石及丞尉刊

名甚衆堯即位至永嘉三年二千七百二十有一載記  
於堯碑

魏陳王曹植帝堯贊曰火德統位父則高辛克流共工  
萬國同臣調適陰陽其惠如春巍巍成功則天之神



太平御覽卷八十



# 欽定四庫全書

子部

太平御覽卷八十一至  
四

詳校官侍讀學士臣沈咸熙

員外郎臣牛稔文覆勘

總校官降調編修臣倉聖脈

校對官助教臣胡予襄

謄錄監生臣張曾詣

欽定四庫全書

太平御覽卷八十一

宋 李昉等 撰

皇王部六

帝舜有虞氏

帝舜有虞氏

史記曰虞舜名重華冀州人也作什器於壽丘就時於  
負夏舜父頑母嚚弟象傲皆欲殺不可得即求常在側舜

耕厯山厯山之人皆讓畔漁雷澤雷澤之人皆讓居陶  
河濱河濱器不苦窳堯乃賜舜絺衣與琴為築倉廩予  
牛羊舜舉八愷使主后土以揆百事舉八元使布五教  
于四方皋陶為大理平民各伏得其實伯夷主禮上下  
咸讓垂主工師百工致功益主虞山澤辟棄主稷百穀  
時茂契主司徒百姓親和龍主賓客遠人至四海咸戴  
帝舜之功於是禹乃興九韶之樂鳳凰來翔舜年五十  
攝行天子事年五十八而堯崩年六十一代堯踐帝位

即位三十九年南巡狩崩于蒼梧之野葬於南江九疑

帝王世紀曰舜姚姓也其先出自顓頊顓頊生窮蟬窮蟬有子曰敬康生勾芒勾芒有子曰橋牛橋牛生瞽瞍妻曰握登見大虹意感而生舜於姚墟故姓姚名重華字都君龍顏大口黑色身長六尺一寸有聖德始遷於負夏販於頓丘債於傅虛家本冀州每徙則百姓歸之其母早死瞽瞍更娶生象傲而父頑母嚚咸欲殺舜舜能和諧大杖則避小杖則受年二十始以孝聞堯以二

女娥皇女英妻之見舜於貳宮設饗禮迭為賓主南面而問政為司徒太尉試以五典有大功二十夢眉長與髮等堯乃賜舜以昭華之玉老而命舜代己攝政明年正月上日始受終于文祖太尉行事堯崩三年喪畢以仲冬甲子月次于畢始即真以土承火色尚黃乃詢四岳闢四門明四目達四聰東巡狩登南山觀河洛受圖書褒賜羣臣尊任伯禹稷契臯陶伯益時有苗氏負固不服禹請征之舜曰我德不厚行武非道也吾其敷吾

德也乃修教三年執干戚而舞之有苗請服立誹謗之  
木申命九官十二牧及及旰朱虎熊羆等二十五人三  
載一考績黜陟幽明於是俊又在官羣后德讓百僚師  
師以五采章施于五色為服以六律五聲八音協治用  
之和洽烝民乃粒萬邦作乂庶績咸熙乃作大韶之樂  
簫韶九成鳳凰來儀擊石拊石百獸率舞故孔子稱韶  
盡美矣又盡善也景星曜於房羣瑞畢臻德被天下  
初舜既踐帝位而父瞽瞍尚存戴天子車服而朝焉

天下大之故曰大舜都於咸陽或營蒲坂媯汭嬪于虞  
故因號有虞氏二妃元妃娥皇無子次妃女英生商均  
次妃登北氏生二女霄明燭光有庶子八人皆不肖故  
以天下禪禹舜年八十即真八十三而薦禹九十五而  
使禹攝政攝五年有苗氏叛南征崩于鳴條年百歲殯  
以瓦棺葬於蒼梧九嶷山之陽是爲零陵謂之紀市在  
今營道縣下有羣象爲之耕

洛書靈准聽曰有人方面日衡重華握石椎懷神珠

推讀  
曰鍾

鍾平輕重也握謂知玉衡之璿璣玉衡以齊七政厯象道懷神珠喻有聖性也

日月星辰正月上日舜受終鳳凰儀黃龍感朱草生

冀茨孽西王母授益地圖

西王母得益地之圖來獻

尚書舜典曰慎徽五典五典克從納于百揆百揆時敘賓于四門四門穆穆納于大麓烈風雷雨弗迷帝曰格爾舜詢事考言乃言底可績三載汝陟帝位

尚書帝命驗曰虞舜聖在側陋光耀顯都握石推懷神

珠

推讀曰鍾神珠喻聖性



尚書中候考河命曰帝舜曰朕惟不又冀英浮著獸舞

鳳晨

冀英浮著萌芽百獸率舞鳳凰司晨也

又曰若稽古帝舜曰重華欽翼皇象

翼奉也象歷也舜敬奉皇天之歷數

也

又曰舜至于下稷榮光休至

稷讀曰側下之側曰西黃之時休美也榮光氣也

龍負卷舒圖出水壇畔赤文綠錯

錯分也文而以綠色分其間

尚書大傳曰舜不登而高不行而遠

又虞夏傳曰維元祀巡狩四嶽八伯

堯始得義和令為六卿主春夏秋冬

并掌方嶽之事是為四嶽  
出則為伯後乃分置八伯

壇四奧沈四海

祭水曰沈

封十有

二山肇十有二州濬川

韓詩外傳曰昔舜甑盆無臙而功不以巧獲罪

詩含神霧曰握登見大虹意感生帝舜

大戴禮曰宰我曰請問帝舜孔子曰橋牛之孫瞽瞍之

子也曰重華好學孝友聞於四方陶稼事親寬裕溫良

教而知時畏天而愛民恤遠而親親世以孝聞于天下

三十在位嗣帝位三十九年乃死葬于蒼梧之野

禮記曰舜作五絃之琴以歌南風之詩

又曰舜其大孝也與德為聖人尊為天子富有四海之內宗廟饗之子孫保之

又曰舜其大智也與舜好問而好察邇言隱惡而揚善

執其兩端用其中于民其斯以為舜乎

邇近也近言而善易以進人察

而行之也兩端過與不及也用其中于民賢與不肖皆能行之也斯此也其德如此乃號為舜而克成其志也

又曰子曰後世雖有作者虞帝弗可及也矣君天下生無私死不厚其子子民如父母有惻怛之愛有忠利之

教

禮含文嘉曰舜損己以安百姓

樂動聲儀曰孔子曰簫韶者舜之遺音也溫潤以和似

南風之至其為音如寒暑風雨之動物如物之動人雷

動禽獸風雨動魚龍二儀動君子財色動小人

言樂之動人也

深故舉見事以為喻是以聖人務其本

春秋演孔圖曰舜目四瞳謂之重明承乾踵堯海內富

庶

瞳瞳子也踵猶履也履其所行也

春秋運斗樞曰舜以太尉受號即位為天子五年二月

東巡狩至于中月與三公諸侯臨觀

太尉公官名唐虞五載一巡狩中月

月半也臨觀為舟以泛于河中也

黃龍五彩負圖出置舜前圖以黃玉

為匣如櫝長三尺廣八寸厚一寸四合而連有戶

此合樞紐

之命故龍匣黃也四合百櫝道相合也有戶言可開闔也

白玉檢黃金繩之為泥封

兩端章曰天黃帝符璽五字廣袤各三寸深四分鳥文

文字也四

舜與大司空禹臨侯望博等三十人集發

大司

空公官名臨侯國氏望博名

圖玄色而緋狀可舒卷長三尺二寸廣

九寸

而如也三或為五

中有七十二帝地行之制天文官位度

之差

孝經援神契曰舜龍顏重瞳大口手握襮

龍顏取象車故有此骨表

也重瞳取象雷多精光也大口以象斗星又為天作喉舌握襮手中襮字喻從勞苦起受襮飭致大位也

論語曰舜有臣五人而天下治

五人者禹稷契皋陶伯益

又曰無為而治者其舜也與夫何為哉恭己正南面而已矣

論語撰考識曰堯舜昇登首山觀河渚有五老遊於河

渚相謂曰河圖將來告帝期五老流星上昂有頃赤龍負玉苞舒圖出堯與大舜等共發曰帝當樞百則禪虞

百年而禪于舜

堯喟然歎曰咨爾舜天之歷數在爾躬

孔叢子曰舜身六尺有奇面頷無毛亦聖也

韓子曰歷山農者侵畔舜往耕期年而耕者讓畔河濱漁者爭坻舜往漁期年而漁者讓長東夷之陶者苦窳舜往陶期年而器以牢

墨子曰堯舉舜於服澤之陽

孟子曰鷄鳴而起孳孳為善者舜之徒也鷄鳴而起孳孳為利者蹠之徒也

又曰帝使其子九男事之二女女焉百官牛羊倉廩備以養舜於畎畝之中後舉而加諸上位

又曰舜生於諸馮遷於負夏卒於鳴條東夷之人也

諸馮

負夏鳴條皆地名也負夏在東夷之地故曰東夷之人也

又曰舜之飯糗茹草也若將終身焉及其為天子也被衿衣鼓琴二女果若固有之

衿衣畫繪者也此言舜窮居之時若將終身及其為



萬乘之主被服繪繡若固常  
自所有也分定使之然也

又曰舜之居深山之中與木石居與鹿豕遊其所以異  
於深山之野人者幾希

又曰舜流共工于幽州放驩兜于崇山殺三苗于三危  
殛鯀于羽山四罪而天下咸服

又曰大舜有大焉善與人同舍己從人樂取於人以為  
善自耕稼陶漁以至為帝無非取於人者取諸人以為  
善是與人為善者也故君子莫大乎與人為善

又曰天下大悅而將歸已視天下悅而歸已猶草芥也

唯舜為然

舜不以天下歸已為樂號泣于田也

不得乎親不可以為人不

順乎親不可以為子舜盡事親之道而瞽瞍底豫瞽瞍底豫而天下化瞽瞍底豫而天下之為父子者定此之謂大孝

又曰堯崩三年之喪畢舜避堯之子於南河之南天下諸侯朝覲者不之堯之子而之舜訟獄者不之堯之子而之舜謳歌者不謳歌堯之子而謳歌舜故曰天也夫

然後之中國踐天子位焉

莊子曰羊肉不慕蟻蟻慕羊肉羊肉羶也舜有羶行百姓悅之故三徙成都至鄧之墟十萬家堯聞舜之賢舉

之童土之地

童土不生草之地

曰冀得其來之澤

舜來施恩澤也

又曰舜讓天下於善卷善卷曰余立於宇宙之中冬日衣皮毛夏日衣葛絺春耕種足以勞動秋收斂足以休食日出而作日入而息逍遙於天地之間而心意自得吾何以天下為哉悲夫子之不知余也遂不受於是去

而入深山莫知其處

又曰舜以天下讓其友北人無擇北人無擇曰異哉后之為人也居於畎畝之中而遊堯之門已若是而已又欲以辱行漫我吾羞見之自投清冷之淵

尸子曰舜兼愛百姓務利天下其田厯山也荷彼耒耜耕彼南畝與四海俱有其利其漁雷澤也旱則為耕者鑿瀆儉則為獵者表虎故有光若日月天下歸之若父母

又曰舜南面而治天下天下太平燭於玉燭息於永風  
食於膏火飲於醴泉舜之行其猶河海乎千仞之溪亦  
滿焉由此觀之禹湯之功不足言也

又曰堯問於舜曰何事曰事天何任曰任地何務曰務  
人

又曰舜一徙成邑再徙成都三徙成國其致四方之士  
堯聞其賢徵之草茅之中與之語政至簡而易行與之  
語道廣大而不窮於是妻之以嬪媵之以娥九子事之

而託天下焉

又曰舜云從道必吉反道必凶如影如響

又曰舜事親養老為天下法其遊也得六人曰雒陶方回續牙伯陽東不識秦不空皆一國之賢者也

又曰昔者舜兩眸子是謂重明作事成法出言成章

又曰舜舉三后而四死除何為飢渴寒暄勤勞鬪爭

又曰有虞之君天下也使天下貢善商周之君天下也使天下貢財

公孫弘曰舜牧羊於黃河遇堯舉為天子

陸賈新語曰舜藏黃金於嶰巖之山捐珠玉於五湖之淵以塞淫邪之欲

淮南子曰舜之時共工振滔鴻水

滔漫也共工炎帝之後隨高堙下壅百川以為民害

以薄空桑

空桑地名在魯

龍門未開呂梁未發江淮通流四海

漳溟民皆上丘陵赴樹木舜乃使禹疏三江五湖決伊

闕導滙澗通溝洫注之東海鴻水漏九州乾萬民皆寧

又曰昔者舜耕于歷山

歷山在濟陽城南

期年而田者爭處磽

确以封畔肥饒相讓也釣於河濱期年而漁者爭處湍

瀨

湍疾瀨淺

以曲隈深澗相與也

又曰舜作室築牆茨屋辟地令民皆去巖穴各有室家  
南征三苗道死蒼梧

列子曰舜嘗駕五龍以騰康衢武嘗服九駮以馳文塗  
此上御也

徐氏中論曰小人恥其面不如子都君子恥其行不如  
舜禹



杜夷幽求曰以舜禹之登庸孔氏之窮屈不似鼓鼈之與晨驥乎

符子曰舜禪夏禹於洞庭之野

呂氏春秋曰舜有九男不予其子而授禹至公也

風土記曰舜東夷之人生於桃丘媯水之汭損石之東

舊說言舜上虞人也虞即會稽縣距餘姚七十里始寧

上虞南鄉也後為縣桃丘即姚丘方相近也今吳北亭

虞濱在小江裏縣復五十里對小江北岸臨江山有立

石所謂損石者也斜角西南指俗呼為為公轉高石也

太平御覽卷八十一

欽定四庫全書

太平御覽卷八十二

宋 李昉等 撰

皇王部七

夏禹

帝啓

帝太康

帝仲康

帝相

有窮后羿

寒浞

帝少康

帝杼

帝槐

帝芒

帝泄

帝不降

帝扃

帝厘

帝孔甲

帝皐

帝發

帝桀

夏禹

史記曰夏禹名曰文命禹之父曰鯀鯀之父曰帝顓頊

顓頊之父曰昌意昌意之父曰黃帝帝堯之時洪水滔天浩浩懷山襄陵下民其憂堯求能治水者羣臣四岳皆曰鯀可於是用鯀治水無功乃殛鯀於羽山堯崩舜問四岳曰有能成美堯之事者使居官皆曰伯禹為司空可成美堯之功舜曰嗟然命禹汝平水土維是勉之禹拜稽首讓于契后稷臯陶舜曰女其往視爾事矣禹為人敏給克勤其德不違其仁可親其言可信聲為律身為度稱以出疊疊穆穆為綱為紀禹乃遂與益后稷奉

帝命命諸侯百姓興人徒以數土行山表木定高山大川禹傷先人之功不成受誅乃勞身焦思居外十三年

過家門不敢入陸行乘車水行乘船泥行乘橈

孟子橈形如箕

橋行泥上如浮曰橈謂

以板置泥上通行路也山行乘橦

徐廣曰橦音丘遶反如薄曰橦車謂以鉄

如錐長半寸施之履下以上下山不蹉跌也

開九州通九道陂九澤度九山

舜崩三年喪畢禹避舜之子商均於陽城天下諸侯皆去商均而朝禹禹於是遂即天子位南面朝天下國號曰夏后姓姁氏娶塗山氏之女生子曰啓禹東巡狩至

于會稽而崩

帝王世紀曰伯禹夏后氏姁姓也母曰修己見流星貫  
昴夢接意感又吞神珠薏苡胷折而生禹於石紐虎鼻  
大口兩耳參漏首戴鈎鈴當胷有玉斗足文履已故  
名文命字高密身長九尺二寸長於西羗而東夷卒也  
禹未登用之時父既降在匹庶有聖德夢自洗于河觀  
於河始受圖括地象也圖言治水之意四嶽舉之舜進  
之堯堯命為司空繼鯀治水乃勞身勤苦不重徑尺之



壁而愛日之寸陰手足胼胝故世傳禹病偏枯足不相  
過至今巫稱禹步是也又納禮賢士一沐三握髮一食  
三起堯美其績乃賜姓姒氏封為夏伯故謂之伯禹天  
下宗之謂大禹年二十始用三十二而洪水平年百歲  
崩于會稽因葬會稽山陰縣之南今山上有禹冢井祠  
下有羣鳥耘田

修已或云  
修紀未詳

河圖握矩起曰帝命伯禹曰告汝九術五勝之常可以  
克之汝能從之汝師徒將興

雒書靈准聽曰有人

謂禹也

大口兩耳參漏足文履已

漏空

也戊己土之日故當平水土故以為名也

首戴鈎鈴

有骨表如鈎鈴

胃懷玉斗

懷璇璣玉

衡之道或以為有黑子如玉斗也

書曰禹別九州

分其圻界

隨山濬川

刊其木深其流

任土作貢

任其土地

所有貢賦

又曰正月朔旦受命于神宗

受舜終事之命神宗即帝之宗廟言神尊也

率

百官若帝之初

舜初攝帝故事

尚書帝命驗曰禹白帝精以星感

星金精也

修己山行見流

星意感栗然生似戎文禹

栗然威貌似禹氏禹生戎地一名政命

尚書璇璣鈴曰禹開龍門導積石決岷山治九貢

龍門積石

山名貢功也治九州之功

又曰禹開龍門導積石出玄珪上刻曰延喜玉受德天

錫佩

禹功既成天出玄珪以錫之古者以德佩禹有治水功故天佩以玄玉

尚書中候曰伯禹在庶

伯禹即禹號也因為德謚庶庶人也

四嶽師舉薦

之帝堯

四嶽四方諸侯也師衆也薦進也

握括命不試爵授司空

禹握括地

象天已命之故不復試以衆官司空於周為冬卿掌制國之五溝行導水之事伯禹稽首讓于

益歸

稽首拜首至手益歸賢者堯臣歸讀曰夔

帝曰何斯若真

何不聽讓之辭斯此也若

汝也此汝

出爾命圖示乃天

爾汝也禹方讓隱之故曰出汝所天命也圖括地象

真其人

示讀曰祗祗是也乃

天使汝治水非我也

伯禹曰臣觀河伯面長人首魚身出曰吾河精也

觀於河

河水

授臣河圖帶足入淵

河圖謂括地象帶足去也音帶

伯禹拜辭

將

行故

拜去

詩含神霧曰禹之興黑風會紀

黑力黑也風風后也並黃帝臣復神伯禹當斯

而至也

禮曰禹立三年百姓以仁遂焉

大戴禮曰宰我曰請問禹孔子曰高陽之孫鯀之子曰  
文命敏給克濟其德不回其仁可親其言可信聲為律  
身為度左準繩右規矩履四時據四海平九州戴九天  
明耳目治天下

禮含文嘉曰禹卑宮室垂意於溝洫百穀用成神龍至  
靈龜服玉女敬養天賜

左傳曰禹會諸侯於塗山執玉帛者萬國

春秋孔演圖曰天命之見侯其門靈龜穴庭玄龍御雲

靈龜虛虎也穴庭者星入太微門  
玄龍水精也御雲者蓋此召氣也

春秋元命苞曰禹之時民大樂其駢三聖相繼故樂夏  
名夏者大也

孝經鉤命訣曰命星貫昴修紀夢接生禹

命使之星謂  
流行之星也

遁甲開山圖曰禹遊於東海得玉碧色長一尺二寸光  
如日月自照達幽冥

揚雄蜀王本紀曰禹本沒山廣柔縣人生於石紐其地

名胤兒畔禹母吞珠孕禹拆埴而生於縣塗山妻生子

啓

紀年曰禹立四十五年

論語曰子曰禹吾無間然矣

孔子推禹功德之盛也言不能復間廁其間也

菲

飲食而致孝乎鬼神

馬融曰菲薄也致孝鬼神祭祀豐潔也

惡衣服而致

美乎黻冕

孔安國曰損其常服以盛祭祀

卑宮室而盡力乎溝洫

方里為井

井間有溝溝深廣四尺十里為城城中有洫洫深廣八尺也

符子曰禹讓天下於奇子奇子曰君言佐舜勞矣鑿塗山

川通河漢首無髮股無毛故舜也以勞報子我生而逸不能為君之勞矣

越絕書曰禹始憂民救水到大越於茅山大會計爵有功更名茅山謂之會稽及其王也巡狩大越

吳越春秋曰禹案黃帝中經見聖人所記曰在九疑山東南天柱號曰宛委承以文玉覆以盤石其書簡青玉為字編以白銀禹乃東巡狩登衡山求之卧見赤繡衣男子自稱玄夷蒼水使者來候禹令禹齋三月更求之



禹乃齋三月登宛委山取得書通水經遂周行天下使  
益疏記之名曰山海經

又曰舜崩禹服喪三年朝夕號泣形體枯槁面目黎黑  
十州記曰禹治洪水畢乃乘蹻車到鍾山祀上帝於北  
阿歸大功於九天禹經諸侯五岳使工刻石識其里數  
高下其字科斗書非漢人所了諸名山亦然

驚子曰禹之治天下也以五聲聽門縣鼓鐘鐸磬而置  
輶於冀虞曰教寡人以道者擊鼓諭寡人以義者擊鐘

告寡人以事者振鐸語寡人以憂者擊磬有訟獄者揮  
鞀此之謂五聲是以禹嘗據饋而七起日中不暇食於  
是四海之士皆至

隋巢子曰昔三苗大亂天命殛之夏后受之大神降而  
輔之司祿益食而民不饑司金益富而國家寶司命益  
年而民不夭四方歸之

莊子曰昔者禹堙洪水親自操耒耜而滌天下之川股  
無跋脛無毛沐甚雨櫛疾風置萬國禹大聖也而形勞

天下如此使後世之墨者多以裘褐為衣以屨屨為服  
日夜不依以自為極曰不能如此非禹道也不足為墨

孟子曰書曰洚水警余洚水者洪水也

書尚書逸篇也  
水逆行洚洞無

涯故曰洚  
水洪水也

使禹治之禹掘地而注之海驅蛇龍而放之

菹水由地中行江淮河漢是也險阻既遠鳥獸之害人

者消然後人得平土而居之

堯使舜治洪水通九州故  
曰掘地而注之海也菹澤

生草者也今青州為澤有草者為菹水流行於地而去  
也民下居就平土故曰險阻遠也水去故鳥獸害人者  
盡消也

尸子曰禹長頸鳥喙面貌亦惡天下從而賢之好學也已

又曰古者龍門未闢呂梁未鑿禹於是疏河決江十年不闕其家生偏枯之病步不相過人曰禹步

墨子曰禹葬衣衾三領桐棺三寸葛以紃

補庚切

之下不

及泉上不通臭既葬收餘壤為壟若參耕之畝

韓子曰禹之王天下也身執木耒畚以為民先服無完肢體無生雖臣虜之勞不若於此矣

呂氏春秋曰禹年三十未娶行塗山恐時暮失制乃娶塗山女

又曰禹南濟乎江黃龍負舟舟中之人恐懼禹仰而笑曰余受命於天竭力以濟萬民命受天也奈何憂於龍焉龍弭耳低尾而逃

又曰昔者禹一沐而三握髮一食而三起以禮有道之士通乎己之不足通乎己之不足則不與物爭矣

又曰禹之決江水也民聚瓦礫及其事已成功已立爲

萬世利禹之所見者遠也而民莫知之

賈誼書曰禹常晝不暇食而夜不暇寢矣方是時憂務民也

淮南子曰昔者鯀作三仞之城諸侯倍之禹知天下叛之乃壞城平地散財物禁甲兵施之以德海外賓服四夷納職

又曰禹沐淫雨櫛疾風決江疏河鑿龍門闢伊闕修彭蠡之防乘四載隨山刊木平治水土定千八百國夙興

夜寐以致聰明輕賦薄斂以寬民氓布德施惠以振困窮弔死問罪以養孤孀百姓親附政令流行

又曰禹為水以身解於陽旰之河

解禱也陽旰河在秦

又曰堯之時天下大水禹身執畚鍤以為民先疏河而導九支

支分

鑿江而通九路辟五湖而定東海

又曰禹之趨時冠挂而不顧履遺而不取

冠有所挂著去不暇顧視

非爭其先也爭其時也

說苑曰禹見罪人下車問而泣之左右曰夫罪人不順

道故然焉君王何為痛之至於此也禹曰堯舜之民皆以堯舜之心為心今吾為君百姓皆以其心為心是以痛之抱朴子曰禹乘二龍郭支為馭

黃帝玄女兵法曰禹問於風后曰吾聞黃帝有負勝之圖六甲陰陽之道今安在乎風后曰黃帝藏會稽之山下其坎深千丈廣千尺鎮以盤石致難得也禹北見六子問海口所出禹乃決江口鳴角會稽龍神為見匱玉浮禹乃開而視之中有天下經十二卷禹未及持之其



四卷飛上天禹不能得也其四卷復下陂池禹不能極也禹得中四卷開而視之

魏陳王曹植贊曰吁嗟夫子拯世濟民克卑宮室致孝鬼神蔬食薄服紱冕乃新厥德不回其誠可親疊疊其德溫溫其仁尼稱無間何德之純

又禹治水贊曰嗟夫夏禹實勞水功西鑿龍門疏河導江梁岐既闢九州以同天賜玄圭奄有萬邦

又禹渡河贊曰禹濟于河黃龍乘船舟人並懼禹仰歎

天子受天運勤功恤民死亡命也龍聞弭身

周庾信禹渡江贊曰二江初鑿九谷新成風飛鷁涌水  
起龍驚樂天知命無待憂生危舟遂靜亂楫還平

### 帝啓

歸藏曰昔夏后啓筮享神於大陵而上鈞臺枚占臯陶  
曰不吉

史記曰昔夏后啓筮乘龍以登于天占於臯陶曰吉而  
必同與神交通以身為帝以王四鄉

又曰啓禹之子其母塗山氏之女也有扈氏不服啓伐之大戰于甘將戰作甘誓遂滅有扈氏天下咸歸

山海經曰大樂之野夏后啓於此舞九代馬乘兩龍雲蓋三層左手操翳右手操環珮玉璜在大運山北一曰大道之野

帝王世紀曰啓升后十年舞九韶三十五年征河西又曰帝啓一名建一名余德教施于四海貴爵而尚齒養國老于東序養庶老于西序在位九年年八十餘而

崩

越絕書曰禹崩啓立曉知王事達君臣義

呂氏春秋曰夏后伯啓與有扈氏戰于甘澤而不服六卿請復之夏后伯曰不可吾地不淺吾民不寡伐而不服是吾德薄而教不善也於是乎處不重席食不二味琴瑟不張鐘鼓不修子女不飾親親長長尊賢使能暮年而有扈氏服故欲勝人者必先自勝矣

帝太康

書曰太康尸位以逸豫滅厥德黎民咸貳乃盤遊無度

畋于有洛之表十旬不返有窮后羿因民弗忍距于河

厥弟五人御其母以從傒于洛之汭五子咸怨迷大禹

之戒以作歌其一曰皇祖有訓民可近不可下

皇君也  
君祖禹

有訓戒也近謂親  
之下謂失人者也

民惟邦本本固邦寧

言人君當安  
民以安國也

予

視天下愚夫愚婦一能勝予

言能敬畏小民  
所以得衆心

一人三失

怨豈在明不見是圖

三失過非一也不  
見謀是備其微

予臨兆民懍乎

若朽索之馭六馬

十萬曰億十億曰兆言多也懍懼貌  
朽腐也朽腐之索禦六馬言危懼甚

為人上者奈何不敬

龍敬則不驕在上  
不驕則高而不危

其二曰訓有之

內作色荒外作禽荒

作為也迷亂而荒  
色女色禽鳥獸

甘酒嗜音峻宇

雕牆

甘嗜無厭足也  
峻高大雕飾

有一于此未或不亡

此六者棄德  
之君有其一

必亡況  
兼有乎

其三曰維彼陶唐有比翼方

陶唐帝堯氏都冀  
州統天下四方中

今失厥道亂其紀綱乃底滅亡

言失堯之道亂其  
法制自致滅亡

其四

曰明明我祖萬邦之君有典有則貽厥子孫

典謂經籍  
則法度貽

遺也遺  
及後世

關石和鈞王府則有荒墜厥緒覆宗絕祀

金鐵  
衡石

供民器用通用使和平則官民足言  
古制存而太康失其業以取亡

其五曰嗚呼曷歸

子懷之悲

曷何也言思而悲也

萬姓仇子子將疇依鬱陶乎子

心顏厚有忸怩弗慎厥德雖悔可追

言人君行已不慎其德以速滅

敗雖已改悔其可追及乎言無益也

帝王世紀曰太康無道在位二十九年失政而崩

### 帝仲康

書曰惟仲康肇位四海胤侯命掌六師羲和廢厥職酒

荒于厥邑胤后承王命徂征

羲和廢其職官還其私邑以酒迷亂仲康命胤侯掌

六師往就其邑討之

帝相

紀年曰帝相即位處商丘元年征淮夷二年征風夷及黃夷

帝王世紀曰帝相一名相安自太康已來夏政凌遲為羿所逼乃徙商丘依同姓諸侯斟灌氏斟鄩氏羿遂襲帝號為羿帝

有窮后羿

帝王世紀曰羿有窮氏未聞其姓其先帝嚳以世掌射



故以是加賜以弓矢封之於鉏為帝司射歷唐及虞夏  
至羿學射如吉甫其辭佐長故亦以善射聞與吳賀北  
遊使羿射雀左目羿引弓射之誤中右目羿俯首而愧  
終身不忘故羿善射至今稱之及有夏之衰羿自鉏遷  
于窮石因夏民以代夏政逼篡帝位故號有窮氏

傳曰昔有夏之方衰也后羿自鉏遷于窮石因夏民以  
代夏政恃其射也不修民事而淫于原獸棄武羅伯因

熊髡龍圉

四子皆羿之賢臣

而用寒浞

土提反

寒浞伯明氏之讎

子弟也伯明后寒棄之夷羿收之信而使之以為己相

浞行媚于內而施賂于外愚弄其民而娛羿于田樹之

詐慝以取其國家外內咸服羿猶不悛將歸自田家衆

殺而烹之以食其子

食羿子

其子不忍食諸死于窮門

殺之

於國門

靡奔有鬲氏

靡夏遺臣事羿者有鬲國名

浞因羿室生澆

五叫反

及豷

音處

恃其讒慝詐偽而不德于民使澆用師滅斟灌

及斟鄩氏

二國夏同姓諸侯仲康之子后相所依

處澆于過處豷于戈

過戈

二國名

靡自有鬲氏收二國之燼以滅浞而立少康少康

滅澆于過后杼滅豷于戈

后杼少  
康子

有窮由是遂亡

寒浞

帝王世紀曰寒浞有窮氏既篡羿位復襲有窮之號浞因羿之室生澆及豷多力能陸地盪舟浞使羿率師滅斟灌斟鄩氏殺夏帝封澆於過封豷於戈恃其詐力不恤民事初羿之殺帝相也妃有仍氏女曰后緡方娠逃出自竇歸于有仍生少康焉初夏之遺臣曰靡事羿羿死逃奔有禹氏收斟灌斟鄩二國餘燼殺寒浞而立少

康

帝少康

傳曰昔有過澆殺斟灌以伐斟鄩

澆寒浞封於過

滅夏后相后

緡方娠逃出自竇

后緡相妻也娠懷身也

歸于有仍生少康為仍

牧正

牧官之長

澆使椒求之逃奔有虞為之庖正虞思於是

妻之以二姚

思有虞君也自以二女妻少康姚姓也

而邑諸綸

綸虞邑也

有田

一成有衆一旅

方十里為成五百人為旅

能布其德而兆其謀

兆始也

以收夏衆撫其官職遂滅過戈復禹之績祀夏配天不

失舊物

魏高貴鄉公少康漢高論曰少康生於滅亡之後降為諸侯之隸崎嶇逃難僅以身免能布其德而非其謀卒滅過戈光復禹績非至德弘仁豈濟斯勲漢祖因土崩之勢專任智力以成功業為子則數危其親為君則囚繫其賢相身沒之後社稷幾傾若與少康易時而處或未能復大禹之績矣又論曰三代之世任德濟勲如彼之難秦項之際任力功成如此之易且太上立德其次

立功就令漢祖功高未若少康盛德之茂也

帝杼

直呂反

紀年曰帝杼居原自遷于老王

帝王世紀曰帝杼一號后杼或曰公孫曼能率禹之功  
夏人報祭之在位十七年

帝槐

紀年曰后芬立四十四年

帝王世紀曰帝芬一名帝槐或曰祖武在位二十六年

帝芒

紀年曰后芒即位元年以玄珪賓于河東狩于海獲大魚后芒陟位五十八年

帝王世紀曰帝芒一名和或曰帝芒

帝泄

帝王世紀曰帝泄一名帝世或曰泄宗在位十六年

帝不降

紀年曰不降即位六年伐九苑五十九年

其弟立是為帝高

帝王世紀曰帝不降一名帝降或曰北成

北字或作江字

帝局

帝王世紀曰帝局一名帝禹或曰高陽在位二十二年

帝廕

音近

紀年曰帝廕一名盾甲即位居西河天有妖孽十日並出

帝王世紀曰帝廕一名頊或曰董江在位二十年

帝孔甲



左傳曰昭二十九年秋龍見于絳郊晉魏獻子問於蔡墨曰蟲莫智於龍以其不生得也信乎對曰古者畜龍故國有豢龍氏御龍氏有夏孔甲擾于有帝

擾順也其德能順于

天帝賜之乘龍河漢各二

四頭為乘各二乘十六頭

各有雌雄

史記曰帝孔甲立好方鬼神事淫亂夏后氏德衰諸侯叛之天降龍二有雌雄孔甲不能食未得豢龍氏陶唐既衰其後有劉累學擾龍于豢龍氏以事孔甲孔甲賜之姓曰御龍氏

漢書曰孔甲作盤盂銘三十六篇

列仙傳曰師門為夏孔甲龍師孔甲不能修其心意殺而埋之外野一旦風雨迎之頃則山木皆焚孔甲祠而禱之未還而道死

呂氏春秋曰夏后孔甲于東陽賓音頻山天大風晦孔甲

迷入民室主人方乳

乳產也

咸言后來是良日子誰敢殃

之長成人幕動折撿斧破斬足遂為守者

以其無足為守門之官

乃作破斧之歌

帝皐

紀年曰后昊立三年

帝皐也

帝王世紀曰帝皐一名皐苟

帝發

紀年曰帝發一名后敬或曰發惠

其子立為桀

帝桀

歸藏曰昔桀伐唐而枚占於營營或曰不吉不利出征  
唯利安處彼狸為鼠

書曰伊尹相湯伐桀升自陟遂與桀戰於鳴條之野

尚書帝命驗曰桀失其玉鏡用其噬虎

玉鏡喻以清明之道噬虎喻暴

虐之風

尚書帝命候曰夏桀無道殺關龍逢圯滅皇圖壞亂歷

紀

皇天也紀綱紀也天之圖歷龍逢引以諫桀也

殘賊天下

刑法峻也

賢人遁逃

避時

虐也淫色慢易

男女無別

不事祖宗

韓詩外傳曰桀為酒池可以運舟糟丘足以望十里

家語曰夏桀昆吾斬劉黎民如草木者焉天下討之如

金史卷八十二  
匹夫

史記曰自孔甲以來諸侯多叛夏桀不務德而虐傷百姓百姓弗堪乃召湯而囚之夏臺已而釋之湯修德諸侯皆歸湯湯遂率兵以伐夏桀桀走鳴條放而死

紀年曰后桀命扁伐山民山民女于桀二人曰琬曰琰桀愛二人女無子焉斲其名于荅華之玉荅是琬華是琰而棄其元妃于洛曰妹喜桀傾宮飾瑤臺作瓊室立玉門湯遂滅夏桀桀逃南巢氏自禹至桀十七世有王

與無王用歲四百七十一年

帝王世紀曰帝桀淫虐有才力能伸鉤索鐵手能搏虎  
多求美女以充後宮為瓊室瑤臺金柱三千始以瓦為  
屋以望雲雨大進侏儒倡優為爛熳之樂設奇偉之戲  
縱靡靡之聲日夜與妹喜及宮女飲酒常置妹喜於膝  
上妹喜好聞裂縉之聲為發縉裂之以順適其意以人  
駕車肉山脯林以為酒池一鼓而牛飲者三千餘人醉  
而溺水以虎入市而視其驚伊尹舉觴造桀諫曰君王

不聽羣臣之言亡無日矣桀聞言析啞然笑曰子又妖  
言天之有日猶吾之有民日亡吾乃亡耳兩日鬪蝕鬼  
呼於國桀醉不寤湯來伐桀以乙卯日戰于鳴條之野  
桀未戰而敗績湯追至大涉遂禽桀於焦放之歷山乃  
與妹喜及諸嬖妾同舟浮海奔于南巢之山而死

博物志曰夏桀之時為長夜飲深宮中男女雜處三旬  
不出不聽政

太公六韜曰桀時有瞿山之地桀十月鑿山陵通之於

河民有諫者曰冬鑿地穿山是發天之陰泄地之氣天子後必敗桀以妖言殺之

墨子曰桀女樂三萬人晨譟開於衢服文繡衣裳

莊子曰桀之治天下也使天下之人瘁瘁焉人苦其性是不愉也

墨子曰昔夏桀貴為天子富有天下勇力之人生裂眦虎指畫殺人

王孫書曰桀紂為君從愚妄之言違長者之諫衣溫而



忘百姓之寒食美而忘天下之飢或身放南巢或頭懸白旗斯亦無他也但不節財而暴民也

尸子曰伯夷叔齊飢死首陽無地故也桀放於歷山紂殺於鄩宮無道故也有道無地則餓有地無道則亡

又曰昔者桀紂縱欲長樂以苦百姓珍怪遠味必南海之蜃北海之鹽西海之菁東海之鯨此其禍天下亦厚矣

又曰昔夏桀之時至德滅而不揚帝道掩而不興

興舉也

客臺振而掩覆

客臺行禮客之室言不能行禮故天大振動而覆敗

犬羣而入泉

言將壞滅犬失其生故羣入淵一說犬禍

鼠銜藪而席隕

鼠銜展席入人隕內言鼠禍美

人婢首墨面而不容

婢首亂頭也萃興髮并縮為婢首不修容飾也

曼聲吞炭

內閉而不歌

曼聲見世衰亂將滅故吞炭自敗音聲閉氣而不歌

飛鳥鍛翼走獸

決蹄

鍛翼殘翼決致蹇也言桀無道田獵鳥獸悉被創殘翼廢脚蹇

山無峻幹澤無佳

水

峻幹美材佳水清水言入山澤不以時故

又曰桀為璇室瑤臺象廊玉昧

璇瑤石之次玉也象才廊室也

權天下

虐百姓於是湯以革車三百乘伐于南巢

南巢廬江居巢

收之

夏宮天下寧定百姓和輯

譙周法訓曰桀紂雖有天下之位而無一人之譽也猶朽木枯樹逢風則仆也

袁子正書曰桀紂有民不億之衆四嶽三塗之險京山終南之固及在鳴條之野一朝而失天下

符子曰桀觀炮烙於瑤臺謂龍逢曰樂乎龍逢曰樂桀曰觀刑曰樂何無惻怛之心焉逢曰天下苦之而君為樂臣為君股肱孰有心悅而股肱不悅乎桀曰聽子諫

諫得我功之不得我刑之龍逢曰臣觀君冕非冕也冕  
危石也臣觀君履亦非履也履春冰也未有冠危石而  
不壓踏春冰而不陷桀嘆曰子知我之亡而不自知亡  
子就炮烙之刑吾觀子亡子不知我亡龍逢行歌曰造  
化勞我以生休我以炮烙乃赴火而死

禹至桀合  
十九帝

淮南子曰桀之力別脰伸鉤

脰角

索鐵推移大麾

大麾軍  
之大旗

水殺龜鼃陸捕熊羆然革車三百乘困之鳴條

鳴條今  
陳州平

丘禽之焦門也

太平御覽卷八十二